

HITZ BITAN

EZBEHARRA. GI-627 errepidea itxi behar izan zuten

Zubibide bateko pieza bat zintzilik geratu da Eibar-Gasteiz autobide berriko lanetan

Erredakzioa | DONOSTIA

Eibar-Gasteiz autobide berriko lanetako Larreategiko zubibideko porlanezko pieza aurrez fabrikatu handi bat bere tokitik atera zen atzo, eta horrek erortzeko arriskuan jarri zituen beste hiru pieza. Gainera, baliteke hegala beste aldekoak ere erortzeko arriskuan izatea, errepidearen gainean daudenak, hain zuzen ere. Ondorioz, Maltzagatik Arrasate eta Gasteizera doan GI-627 errepidea moztu behar izan zuten, errepide horren gainean izan baitzen zubibidearen mugimendua, Maltzaga eta Soraluze artean. Zubibideak 50 metro ditu luze, eta bakoitzak 240 tona pisatzen du.

GI-627 errepidea hainbat egunetan itxita izango dela jak-

narazi du Gipuzkoako Foru Aldundiak, baina oraindik ez du zehaztu zenbat egun izango diren. Gutxienez datorren asteartera arte itxita egongo dela esan zuen bakarrik.

Atzo istripua izan ostean, Antton Jaime Gipuzkoako Foru Aldundiko Errepide diputatua eta Jose Mari Sarasola Errepide zuzendaria obra tokian izan ziren.

Diputatuak ez zuen ez baieztatu eta ez gezurtatu zubibidearen egitura osoa kolokan gera ote daitekeen. Hala ere, segurtasunari lehentasuna eman nahi izan diotela ziurtatu zuen, lanean ari direnen eta GI-627 errepidea erabiltzen duten gidarien segurtasunari.

Orain Gipuzkoako Foru Aldundiko teknikariak ari dira az-



IMANOL OTEGI / ARGAZKI PRESS

Larreategi zubibideko lanak, iazko urrian.

tertzen zer dela eta gertatu den lur mugimendua, eta datozen orduetan erabakiko dute zer egin zintzilik dagoen pieza eror ez dadin.

Autobidearen obra zati horrek ekainaren hasierarako

egon behar zuen irekita, baina ezbehar horrek atzeratu egingo du, eta baliteke galera ekonomiko handiak ekartzea.

Obrak bisitatzen izan ziren Aldundiko politikari eta teknikariak arduratuta agertu ziren

gertatuarengatik. Jaimek esan zuen hasi direla aztertzen zer neurri hartu obraren egoera hobetzeko eta errepidea ireki ahal izateko. Bestalde, ezbeharren zioak argitzeko azterketa abiatu dutela gaineratu zuen.



JOXE LACALLE

EUSKARA

Nafarroako Arartekoak gomendatu dio Iruñeko Udalari harrera euskaraz egiteko eskubidea bermatzea

Maria Jesus Aranda Nafarroako Arartekoak gomendatu dio Iruñeko Udalari herritarrek zerbitzua euskaraz izateko duten eskubidea bermatzea. «Administrazioak lehenbailehen hartu behar du lituzke neurriak herritarrek zerbitzua euskaraz edo gaztelaniaz izateko duten eskubidea bermatzeko inportanteak diren udal zerbitzuetan». Emakume bat kexatu egin zitzaion Arartekoari, eta kexu horren ondorioz egin dio gomendioa Arartekoak Udalari. Hain zuzen ere, indarrean den Udalaren Euskararen Araudia betetzeko eskatu du Arartekoak.

Lehen bilera egingo du gaur izendatu berri duten Euskararen Aholku Batzordeak, Gasteizen

Eusko Jaurlaritzako Kultura Sailak izendatu berri duen Euskararen Aholku Batzordeak gaur egingo du estreinako bilera, 10:30ean, Lehendakariatzako egoitzan. Gaurko bileran Euskararen Aholku Batzordeak Euskara Biziberritzeko Plan Nagusiaren garapena, batzorde osoaren eraketa, egitekoak, lan prozedurak eta aurtengo ekintza planak eztabaidatuko ditu. Euskararen Aholku Batzordeko kide berriak dira, besteak beste, Jon Sarasua, Andoni Egaña, Ramon Saizarbitoria, Bernardo Atxaga, Ana Urkiza, Sagrario Aleman eta Xabier Usabiaga.

ISTRIPUAK

Bi lagun hil dira, Nafarroan, Puiun eta San Adrianen izandako auto ezbeharretan

Bi lagun hil ziren, herenegun gauean eta atzo Nafarroan izandako auto ezbeharretan. Lehen istripua Puiun izan zen, herenegun gaueko 21:40 aldera. I.G.A. Zarrakasteluko 21 urteko mutila hil zen, gidatzen zuen autoa N-121 errepidetik irten ostean izandako zauriengatik. Bestalde, atzo, San Adrianen Luis E.M. 77 urteko gizona hil zen, gidatzen zuen furgonetak kamioi bat jo ondoren. Istripua NA-134 errepidean izan zen, San Adriango industrialdearen parean. Kamioiko gidariak ez zuen izan zauririk.

ERASOA

Lagun bati kristalezko botila puskatu batekin eraso egitea leporatuta atxilotu dute gizonetzko bat

Ertzaintzako agenteek 49 urteko R.L.A. Pasaiko bizilagun bat atxilotu zuen atzo, Donostian, gizon bat hiltzen saiatu izanaz akusatuta. Hain zuzen ere, kristalezko botila puskatu batekin egin omen zion eraso gizonak, eta aurpegian zauritu zuen. Ondorioz, zauritutakoa ospitalera eraman behar izan zuten sendatzerara. Atzo gertatu zen, Martuetxe etxean, Donostiako Hipikaren inguruan. Agenteak agertu zirenerako, zaurituak odol ugari zuen galduta, eta erasotzailea hartua zuten bi lagunene artean.

GERTAKARIAK

Sei hilabeteko kartzela zigorra ezarri diote emakume bati, Iruñeko udaltzainei eraso egitea leporatuta

Iruñeko 3. Zigor Aretoak sei hilabeteko kartzela zigorra ezarri dio Maria Dolores Contell Garcia 38 urteko emakumeari, Nafarroako hiriburuko udaltzainei eraso egitea leporatuta. Epaia arabera, eraso 2001eko abenduaren 29an izan zen, Iruñeko Gaiarre karrikan. Udaltzainak emakumea identifikatzen saiatu zirenean, hark harri bat bota zuen agente baten aurka, baina ez zuen jo. Atxilotu eta gero, polizia etxean, ostikoka aritu zen udaltzainen aurka, epaiak dioenez. Epaia dio egun hartan emakumeak droga eta alkohola hartu zituela.

Bi lagun atxilotu dituzte Bilbon, ostatu batean lapurtzeagatik pistola eta laban batekin

Bilboko Udaltzaingoak bi lagun atxilotu zituen atzo Bilbon, pistola bat eta laban baten laguntzarekin ostatu batean lapurtzeagatik. Hain zuzen ere, ostatuko jabea eta zinpeko guardia lotu egin zituzten, eta gero, lapurtu. Lapurretaren berri jaso eta segituan agertu ziren ostatura udaltzainak, eta han lapurrak atxilotu zituzten.

Urtebeteko zigorra jarri diote Atarrabiako bizilagun bati, exhibizionismo delituagatik

Alexi Giovanni Delgado Molina Porto Velloko herritarri urtebeteko kartzela zigorra eta 2.160 euroko isuna paratu dizkio Nafarroako Auzitegiak, exhibizionismo delitu birengatik. 20 urteko gazteak adingabeen aurrean erakutsi zituen genitalak, bi aldiz, behin Iruñean eta beste batean Antsoainen, epaiaren arabera. Eskolatik irteten ziren adingabeen nesken aurrean egin zituen exhibizioak.

Nafarroa eta Errioxako telefono kabinetan lapurtzen zuen sarea desegin duela dio Guardia Zibilak

Guardia Zibilaren Polizia Judizialak Lituaniako lau herritar atxilotu zituen atzo Kalagurrin (Errioxa), herrialde horretako eta Nafarroako telefono kabinetan lapurtzea leporatuta. Atxilotutakoak D.T. 36 urteko gizona, A.I. 39koa, A.I. 24koa eta A.G. 36koa dira. Guztiak Lituaniarrak dira, eta Tuteran daude errolotuta. Guardia Zibilak dioenez, 14 lapurreta egin dituzte Errioxan eta Nafarroako Erriberan.